

Mid-Day Dogri News Bulletin, 24th November 2024

समे – 12:25

<><><><><><>

PM-MKB

प्रधानमंत्री नरेन्द्र मोदी होरें अज्ज एह गल्ल सांझी कीती ऐ जे “एक पेड़ मां के नाम” अभियान ने छड़े 5एं म्हीनें च 100 करोड़ रुक्ख बूहटे लाने च महत्वपूर्ण मील दा पत्थर पार करी लेआ ऐ। आकाशवाणी दे मन की बात कार्यक्रम च राष्ट्र गी संबोधत करदे होई प्रधानमंत्री होरें इस गल्ल उप्पर खुशी जाहर कीती जे पूरे देश थमां लोकें इस अभियान च हिस्सा लैता। उनें इस गल्ल उप्पर बी फक्र कीता जे एह अभियान हुन दुनिया दे बाकी मुल्ले च बी फैलाया जा करदा ऐ। प्रधानमंत्री होरें लोकें गी इस अभियान च हिस्सा लैने ते बूहटे कन्नै अपनी सैल्फी **My gov.in** उप्पर पोस्ट करने दा आग्रह कीता। स्वच्छता बारे गल्ल करदे होई गलाया जे सरकारी दफतरे च केई दहाके परानियां फाइलां ते कबाड़ हटाने लेई इक विशेष स्वच्छता अभियान शुरू कीता गेआ हा, जेहदे बड़े बेहतर नतीजे आए ते दफतरे च बड़ी मतियां थाहरां खाली होइयां। अज्ज एनसीसी दिवस दे मौके उप्पर बोलदे होई मोदी होरें एनसीसी कैडिट दे रूपै च अपने दिने गी चेता कीता। उनें गलाया जे एनसीसी युवाएं च अनुशासन, नेतृत्व ते सेवा दी भावना पैदा करदी ऐ। प्रधानमंत्री होरें गलाया जे देश च एनसीसी गी होर मजबूत बनाने दे लगातार लतन कीते जा’रदे न। 2014 ब’रे दरान तकरीबन 14 लक्ख नोजवानें एनसीसी कन्नै जुड़े हे ते हुन 2024 च 20 लक्ख शा मते नोजवानें एनसीसी कन्नै जुड़े दे न। मोदी होरें घोषणा कीती जे अगले ब’रे स्वामी विवेकानंद हुंदी 162मीं जयंति उप्पर दिल्ली च विकसित भारत युवा नेता संवाद आयोजत कीता जाग। स्वामी विवेकानंद हुंदी जयंति दे उपलक्ष्य च हर ब’रे 12 जनवरी गी युवा दिवस मनाया जंदा ऐ। प्रधानमंत्री होरें गलाया जे इस संवाद च भारत थमां करोड़ें दी गिनतरी च नोजवान हिस्सा लेंगन। बक्ख-बक्ख राज्यें दे ग्राएं, ब्लाकें ते जिलें थमां चुने गेदे 2 जहार नोजवान संवाद लेई भारत मंडपम च किट्ठे होंगन। अपने संबोधन दे समापन च प्रधानमंत्री होरें गलाया जे उनेंगी लोकें दे फीडबैक , पत्र ते सुझाएं दा इंतजार रौहग ते हर म्हीने मिलने आले एह सनेह उनेंगी होर बेहतर करने लेई प्रेरित करदे न।

<><><><><><>

All Party Meet

संसद दे सयाले आले इजलास कोला पैहले सरकार अज्ज सब्बने पार्टिएं दी इक बैठक लोआ करदी ऐ। रक्षा मंत्री राजनाथ सिंह होर इस बैठक दी प्रधानता करगन। इस बैठक च सरकार संसद दे इजलास दरान लोकसभा ते राज्यसभा दे कम्मकाज गी रमानदारी कन्ने चलाने बारे सब्बने पार्टिएं थमां समर्थन मंगगन। सेयाले आला इजलास कल शुरू होआ कदा ऐ ते एह 20 दिसम्बर तोड़ी चलग। उआं 26 नवम्बर गी संविधान दिवस मनाए जाने दे चलदे पार्लियमेंट दी बैठक नेई होग।

<><><><><><>

CM Omar

मुख्यमंत्री उमर अब्दुल्ला होरें मुख्य भरै दे लोकें गी अपील कीती ऐ जे ओह जम्मू कश्मीर दी सुंदरता ते मेहमानबाजी दा लुत्फ लैने नमीं दिल्ली दे प्रगति मैदान च भारत मंडपम च आयोजित बपार कारोबार सरबंधी इंडिया इंटरनेशनल ट्रेड फेयर च जेएंडके डे सैलीब्रेशन कार्यक्रम गी संबोधत करदे होई मुख्यमंत्री होरें आखेआ जे सब्बने प्रतिभागिएं गी गर्भिएं च जम्मू कश्मीर औने लेई गलाया। उनें आखेआ जे जिसलै पूरे मुख्ये च गर्मीहोंदी ऐ तां लोक इत्थें आइयै इत्थुआं दे कुदरती नजारें ते सुहावने मौसम दा नंद लेई सकदे न। उनें आम लोकें गी श्री माता वैष्णो देवी च मत्था टेकने लेई ओने आस्तै बी साददा दित्ता। अपने संबोधन च मुख्यमंत्री होरें खित्ते दी सांस्कृतिक ते आर्थिक समृद्धि गी उजागर कीता। उनें सब्बने गी पविलियन दा दौरा लाने लेई गलाया तां जे जम्मू कश्मीर दे कलाकारें ते उद्यमिएं गी लाह थोई सकै।

<><><><><><>

J&K - RTI

मुख्य सचिव अटल डुल्लु होरें जम्मू-कश्मीर च सूचना दे अधिकार सरबंधी पोर्टल गी इस ब'रे 10 दिसम्बर तगर शुरू करने दे निर्देश दित्ते न। ऑनलाईन आरटीआई पोर्टल विकसित करने सरबंधी कम्में दा अज्ज जम्मू च लाई गेदी इक बैठक दरान जायजा लेंदे होई मुख्य सचिव होरें सरबंधत अधिकारिएं पर जोर पाया जे ओह इस ब'रे 10 दिसम्बर तगर एह सेवा लोकें दे नमित लाने लेई सब्बै मुमकन जतन करन। उनें इस पोर्टल दे शुरू होई जाने तगर रोजै दे रोज एहदे कम्में दी निगरानी लेई बी हुक्म रसाल कीता। उनें सामान्य प्रशासनिक विभाग – जीएडी पर जोर पाया जे ओह हर इक मैहकमे थमां सरबंधत अधिकारिएं ते नोडल

अफसरें गी एह्दे'नै जोड़ने दे प्रावधान करन। वित्त विभाग सने सूचना टेक्नोलाजी विभाग दे प्रधान सचिव ते होरनें बड़्हे अधिकारिएं बी इस बैठका च हिस्सा लैता।

<><><><><><>

Jaishankar

विदेश मंत्री डॉ. एस.जयशंकर होरें गलाया ऐ जे भारत दे प्रति दुनिया दी अवधारणा च बदलाव आया ऐ। 8में इंडिया आइडियास कनक्लेव गी वर्चुअल ढंगर कन्नै संबोधत करदे होई जयशंकर होरें गलाया जे पिछले दहाके च इक बड़्हा बदलाव दिक्खेआ गेआ ऐ जे हुन भारत च बपार करना बड़ा सखल्ला मन्नेआ जंदा ऐ। उनें गलाया जे मेक इन इंडिया दा हुन होर बेहतर सशक्तिकरण होई चुके दा ऐ। डॉ. जयशंकर होरें गलाया जे भारत हुन जदू अपनी समाजिक-आर्थिक योजनाएं जां फही डिजीटल लैन देन दे व्यापक असर दी गल्ल करदा ऐ ते पूरी दुनिया ओह्दे उप्पर ध्यान दिंदी ऐ। उनें गलाया जे भारत दी डिजीटल प्रौद्योगिकी बड़ी मती प्रभावशाली रेड् ऐ।

<><><><><><>

Guru Tagh Bahadur

अज्ज गुरु तेग बहादुर जेह्ड़े जे सिक्खें दे 9में गुरु न, हुंदा शहीदी दिवस मनाया जा'रदा ऐ। अज्ज दे दिन 1675 च गुरु तेग बहादुर होरें धर्म, मनुक्ख मुल्लें, कर्तव, धर्म ते सिद्धातें दी राक्खी लेई अपनी जिंदू दा बलिदान देई दित्ता हा। हर ब'रे गुरु तेग बहादुर हुंदे बलिदान दिवस गी शहीदी दिवस दे रूपै च मनाया जंदा ऐ।

<><><><><><>